

輝縣志

卷七
卷九

第肆冊



輝縣志卷七

輝縣知縣黔筑周際華石藩纂修

渠田志

泉源

〔百泉〕在縣西北七里爲衛水之源引以灌田其利甚溥由縣西南南雲門流入新鄉界隗村營歸於丹河

〔蓮花泉〕在縣西五里其源發於小營由中曠南合萬泉至南雲門流入衛河灌田十餘頃計長十里

〔卓水泉〕在縣西八里其源發於卓水村由分水橋九聖營南流合萬泉至南雲門入衛河計長十四里

〔萬泉〕發源於卓水村西由朱家橋九聖營南流合卓水

泉由北雲門中噴南流合蓮花泉至南雲門入衛河計長十四里

白沙泉在萬泉東河憲嵇公開大之與萬泉合而爲一同入衛河

清暉泉在縣西十里爲分巡河北道馬駢雲守衛時所鑿灌田十餘頃邑人築亭立石總河王士俊顏之曰清暉並爲之記

丁公泉在縣西五十餘里由王家海王武莊葦園橋孟渰胡村至北流橋東南歸於丹河計長四十一里

張泉在張泉河村東下流與丁公泉合

焦泉在縣西六十里發源於焦泉營與丁公泉張泉合

而爲一卽北流河之上源下入丹河計長五十二里
清濂泉在縣西南四十里南流村繞村南流折而東注
與北流河會

清水泉卽梅竹泉在縣西南六十里其泉發源於山陽
村由魯家莊李千戶營母豬營蔣家莊南流至豐城經
獲嘉縣界歸入丹河寬五六尺深三四尺不等灌田數
十頃計長四十里

重泉在縣西南六十里其源發於魯家莊由重泉村李
千戶營裴村營肖呂村南流合清水泉至豐城入獲嘉
縣界歸入丹河寬五六尺深二三尺不等計長四十一
里

黃龍泉在褚邱東北一里許下流經姚村聶家橋孟渰

等村灌田三十餘頃至胡村店橋西入北流河

崔華採訪

龍頭泉在縣西南七十里王展村南灌田十餘頃

李蘭葉採訪

勸

河渠

衛河卽百泉之水自縣西而南流至新鄉縣合河鎮入

丹河河寬七八尺至一丈不等深五六尺不等康熙三

十年巡撫閩興邦題准於每年三月初一日起至五月

十五日止令三日放水濟運一日塞口灌田但五月係

民間需水之時應用竹絡裝石堵口使大流濟運餘水

灌田旣以濟漕亦無妨於農業雍正五年等事

條陳輝縣五閘偷水灌田有防備道奏准拆去五閘在
河源高處建立三斗門聽水分流中斗門水用以濟漕
兩旁斗門共分一半另於大河兩岸各開小河建立小
閘灌田奉

旨同御史劉 總河嵇 總督田在百泉清暉閣上宣

旨五閘之民咸集因聞拆去舊閘等語眾百姓同聲稟曰河身
低下兩岸甚高雖以斗門分水爾大水奔趨河身兩岸
之水將隨之俱下雖另建十閘終歸無益康熙年間曾
奉

恩旨衛水濟漕兼不悞民田灌溉懇乞大人詳察田大人細問
百姓齊應聲曰種一畝地納三畝地糧本爲水田膏腴

多有出息今禁阻不許用水顆粒無收民命安能存活
今所云拆去五閘另於兩岸別建十閘但兩岸俱在高
處無論兩旁小斗門之水不能分往邊河縱有涓滴而
水性就下亦終滲漏於大河恐徒耗帑金君民兩受其
害大人爲國爲民乞爲小民陳奏下情將稻田減去重
賦情愿仍種旱田誰肯捐生偷水兼可省此帑金田大
人對同列云予向亦疑百姓偷水之非誰知民間有如
此苦顧謂

欽差此五閘似不宜更拆俟小閘建就再行酌奪及其落成全
然無水故舊閘得以仍存

〔三渡河〕在縣西五里卽百泉之支流也昔人引水以灌

稻田仍入衛河

峪河繞縣南境計長七十里其源發於山西省流入鄰境至峪河口內瀝爲三潭一名黑龍一名白龍一名二女三潭下流由老孟莊王敬屯卧狼岡趙宿屯包公廟大屯通濟橋張家莊入獲嘉縣界歸入丹河水清而迅過旱則壅以灌田但秋夏山水暴發河不能容往往有漲溢之害

〔北流河〕卽焦泉張泉丁公泉之合流水渾而多沙灌稻田數十頃秋夏山水暴發武夷口鴨子口之水併入其中往往泛溢

〔溫玉河〕在縣西南七里河久淤塞秋夏水暴發民田衝

沒明知縣聶良杞躬爲相度自胡家橋至劉家莊約七里許開地百餘頃

〔老鬲坡渠〕在縣西南十五里地可種稻舊未有引水之渠卽旱地亦鮮有秋萬歷戊寅知縣聶良杞爲之經畫自姚固村枯河至苗固村創開河渠一道水通石河磨仍歸枯河灌田十餘頃

〔花木村渠〕在老鬲坡東舊有渠接姚固村枯河亦通九聖營河積年淤塞爲患萬歷戊寅知縣聶良杞編夫疏濬約十餘里灌田十餘頃

〔秀才莊新渠〕在縣南二十五里與姬家寨宋家灘穆家莊凡城相連地本窪下秋水爲災荒蕪彌望萬歷戊寅

知縣聶良杞屬夫給食創開新渠一道約十餘里引水入新鄉界歸於丹河計墾荒地百餘頃

魯家莊渠在縣西南七十里地衝關家河口歲有水患萬歷戊寅知縣聶良杞挑渠立閘引水灌田十餘頃

程村渠在縣西南五十里地多沮洳比歲不登萬歷丙子知縣聶良杞捐廉開渠縱橫凡五以疏洩之遂成良田百姓德之呼爲聶公渠亦若蘓堤云

洩水溝在縣東南自玉門關迤西稻田邊起東至新鄉縣交界大路口止長一千六百一丈寬三尺深六尺雍正七年知縣張鏐疏鑿

隄堰

斗門在馬家橋下卽仁字閘西邊雍正五年侍郎何國琮奏准在百泉河源高處建立三斗門中深一丈一尺闊一丈六尺以濟漕旁深一丈五寸東濶五尺四寸西濶四尺五寸以溉田聽水分流復各建石岸防水洩漏

馬家橋上閘在縣西北五里百泉之南嘉靖乙巳知縣郭淳創建大梁李濂有記今更名仁字閘

馬家橋下閘在上閘南嘉靖辛亥分守參議敖宗慶建今更名義字閘

張家灣閘在縣西南二里參議敖公建萬歷癸酉知縣張一通重修邑人李容莊有記今更名禮字閘

稻田所閘在縣西南五里嘉靖辛亥參議敖公建今更

名智字聞 以上二閘萬歷七年知縣聶良杞重修

裴家閘在縣西南十里嘉靖乙未巡撫章煥建萬歷十四年知縣盧大中重修今更名信字閘

按衛水發源蘓門山麓下趨最易瀆水之田屢患湮沒自知縣郭淳始建上閘而分守少參敖公巡撫都御史章公復建四閘壅水分田藝以秔稻蓋自是而邑之荒蕪闕水利與地無沮洳之患民免賠糧之苦矣明萬歷戊寅知縣聶良杞復慮五閘修理無法反於漕政有妨乃建立條格刻石閘上遵奉戶部議單以時啟閉庶幾官民兩便萬世可行四公之惠至今謳思不忘云

附錄復興水利咨詳文卷

衛輝府輝縣知縣滑彬爲

聖慮憂民甚切殘黎痛苦難申幸逢九鼎垂慈永戴萬年鴻庇
事康熙二十八年七月二十三日據本縣士民段上錦
雷發師等呈前事到縣據此該卑職看得輝縣沿勘刀
泉一帶水田自奉封板以來闔邑士民坐視膏腴之產
盡爲石田莫不輟耕嘆息幸蒙老大人軫念民瘼曲體
皇上愛恤窮黎之至意隨荷轉詳大老爺懇切詳盡業允定期
試驗水勢務須漕運民田雨無違礙萬姓歡騰不啻起
骨而肉之矣但去冬詳請之後卽邀俯允迄今尙未定
議本年仍屬拋荒今時屆深秋播麥之時又值漕船回
空之際尙不早爲請命則來年之種植難施人心皇皇

是以士民段上錦等復有此呈請也伏望老大人垂救
民生速賜轉詳總河大老爺卽撥東昌河廳定期試驗
水勢果一涘之泉無關漕運之通塞五日之內得邀一
日放水救田則一邑士民之殘喘皆老大人有以生全
之也世沐高厚之仁焚頂當無既矣須至申者 奉本
府胡 併河糧廳曹 俱批仰候轉詳繳 蒙河道俞

批已批令衛河廳再行訂期探驗矣仍候河撫兩院批
行繳 蒙巡撫都察院閻 批仰候另咨總河部院撥
行東昌河廳遵照前咨緣由試驗詳奪仍候總河部院
批示錄報繳 隨蒙總河部院王 批昨准撫院咨文
現在檄飭訂期會勘試驗矣仰照另檄速行勘議通詳

報奪繳

河道俞森詳文 看得水之爲利上以濟漕下以灌田
誠足

國裕民之要務也第五六七月間田禾望澤糧艘盛行俱
屬需水之候使雨暘時若田旣霑足河亦無乾涸之虞
倘時雨不降泉流微細河旣淺阻而禾亦枯槁當此之
時濟漕灌田殆難兼善然就已成之法斟酌而變通之
又未嘗不交相利也如彰德府安陽縣引洹水而成萬
金渠衛輝府輝縣藉捌刀泉而建五閘自康熙二十三
年以前但資水以灌田而漕之通塞勿計也自康熙二
十五年前河憲靳 以衛河水勢微弱繕疏入告旋行

河撫兩憲會議於每年五六月之間萬金之渠封閉而水不許入捌刀之開啟板而水不許蓄其利全歸之漕此亦足

國之計勢不得不然也行之數年而前院諮訪利弊各該府縣詳請欲於此三月塞渠封板之時每於五日之中少寬一日之禁誠以此三月中田禾需水若無水則無禾無禾則無賦民習於昔年之成規故有司不得不詳請而通融之耳蒙憲批查屢行詳覆撫憲咨商憲臺茲復蒙憲臺檄行查洄水之源起於何處寬深幾許捌刀臬之水是否不藉漕運仰見憲臺體

國勤民欲爲漕運民生圖兩利之計也隨卽遵行兩府確

查茲據各覆前來則洹水之源起於彰德府安陽縣之善應村北行又有珍珠泉合之又北行共長九十里而入衛河此洹水之本來也安陽爲附郭之邑由高平村引洹水入渠名爲萬金渠而洹水之入衛者寬三丈深三尺其流仍盛卽此渠灌田而繞行郡城仍流入洹水同歸衛河是則洹水本盛不因入渠而衰且由渠仍入於洹又非別爲一流而奪洹正派也輝縣之捌刀泉發源於蘓門山麓從地星泛其脈甚細滙爲一池潦不溢而旱亦不絕民田資其灌溉爲水無多故建五閘以蓄之至其下行三十里至合河鎮有丹河來會其流始大至於衛輝是名衛河衛河至淇縣而有淇水合之又至